

EDITORIAL

MESTER EVITA EXTREMONAN
CU VISITANTENAN

Despues di un serie di medida hopi acerta di parti di Gezaghebber y autoridadnan di imigracion, ta bon pa recalca si cu na momento cu interpretacion di leyman of disposicionnan ser hiba te na extremo, e daño cu nan por causa ta igual na e daño causa sin nan.

Dia cu Gezaghebber y e departamento di Imigracion a dicidi cu cosnan tabata bayendo for di man pa motibo di un cantidad increible di hendenan cu a bin di exterior bao e pretexto di turismo pa djey keda y eherce ofishinan pa cual nan no tin e permiso necesario, a bin cu un serie di medida cu a haya e apoyo total di poblacion, especialmente di DIARIO. No por permiti pa extranjeronan bin viola nos leyman impunemente y pa endereza e situacion tabata tin mester di accionnan energico. E accionnan a bin y e resultadonan ta hopi satisfactorio. Un felicitacion publico ta na su lugar, tanto pa Gezaghebber como pa e autoridadnan di Imigracion.

Ultimamente, sin embargo, tin algun caso ta ocurriendo cu ta haci nos pensa cu quizas e intencion di frena e entrada di extranjeronan cu no ta cumpli cu nos requisitonan di ley ta pasando pa e campo equivoca. No por ta asina cu un ley, of un promulgacion oficial, destina pa cierto tipo di ofendedoran contra nos disposicionnan legal ta ser aplica igualmente na kendenan ta bin di bishita cu razonnan legitimo y no ta bira un carga pa nos fisco y ni tampoco pa nos autoridadnan policial of di imigracion. Awe por lesa di un caso asina ariba otro pagina di DIARIO, referente na e mama di Dr. Anaya, kende a bin pa bishita su yiu y ta un señora di edad y di conducta intachable.

Pero no ta e caso aki so ta yama atencion ariba e hecho cu ta bayendo den extremonan innecesario contra algun bishitante den e afan pa controla e yegada di elementonan cu ta bin pa trapa ariba nos leyman di imigracion. Tambe mester tene na cuenta cu no ta tur persona cu bin di algun pais latino necesariamente mester ser tilda di ta indeseable, ya cu no por huzga henter un pueblo pa motibo di algun ciudadano cu pa un motibo of otro ta lanza nan mes den un profesion nada elogiabile. Nos no ta cuestiona e motibo ni e razon tras di e decision di e personanan ey, pero si e profesion ariba su mes.

Ta injusto cataloga, of pensa siquiera cu pasobra tin damanan di tal of cual pais na Aruba eherciendo e profesion mas bieu na mundo, ta henter e pueblo ey ta mescos. Al contrario, ta trata di paisnan y pueblonan cu hopi tradicion di decencia, cultura y civilizacion. Na nan pais nan ta pensa mescos cu nos di esnan cu ta abraza un carrera bastante indignante pa un dama.

Nos ta ripiti, pa no keda ningun duda den e mente di ningun hende: e accionnan energico di tanto Gezaghebber como e autoridadnan di Imigracion merece tur clase di elogio y di nos parti nan tine sigur. Pero ta bon tambe pa nan pensa ariba e hecho cu un ley of un promulgacion mester ser interpreta y aplica na e casonan pa cual nan a ser dicta, y cu un aplicacion general ta conduci na un generalizacion di concepto y criterio cu den hopi caso ta eroneo y completamente injusto. Inocentenan no tin pakico paga pa pecador. Laga e culpablenan sinti e peso di ley, pero laga un provision habri pa esnan cu di ningun manera a ofende ni ta ofende tampoco nos leyman ni promulgacionnan. Severidad den e aplicacion di ley no ta significa a la vez ceguedad den su ehecucion. Pa defende nos isla di elementonan indeseable no ta necesario lastima esnan cu no a bin pa viola nos leyman y no ta un carga pa comunidad.

STATUS APARTE DI ARUBA
NA PELIGRO

ORANJESTAD(AAN)— Un declaracion cu a causa sorpresa ayera, tabata un informe di e lider di MEP na periodistanan Hulandes cu lo por pospone e fecha di independencia di Aruba.

E informe cu a alcanza Aruba ayeratardi, tabata muestra cu e lider di MEP lo no tene na eña 1996 pa independencia di Aruba.

E agencia di noticia ANP a cita e lider di MEP bisando: "Mi ta kere cu Hulanda, Aruba y otro partinan di Reino ta considera importante pa yega na un estabilidad politico cu ta haci Antillas mas atractivo pa e inversionista extranjero. Mester traha duro ariba esaki".

Segun e informe, e independencia di Aruba por ser posponi, y e lider di MEP lo a remarca, manera el a haci ya den pasado, cu e independencia di tur forma lo ser precedi pa un conferencia caminda lo ser estableci si por mantene 1996 como aña pa independencia di Aruba.

Incondicionalmente e lider di MEP a mantene

1 di Januari 1986 como fecha pa Status Aparte di Aruba, comoquiera cu e ta un condicion pa por traha mas efectivamente ariba un estabilidad politico y yega na restructuración di economia di e otro islanan Antillano.

Mientras e informe aki a drenta pues ayeramerdia, y a causa basta impacto for di promer momento, DIARIO a ser informa cu e por significa problema serio den coalicion central y ademas ta pone e realizacion di Status Aparte na peligro.

Informantenan ayega na e proceso di Status Aparte y Independencia a bisa cu un convenio a ser logra na Conferencia di Mesa Redonda. Ya un punto di e convenio a bini atrobe na discusion, esta e asunto di fondo di solidaridad, pa cual no a yega na un solucion y cu por explota cualquier rato.

Luego a bini e asunto di moneda propio pa Aruba, cu a bira topico di estudio atrobe. Esaki ya a haci cu por ejemplo un miembro di e coalicion central a muestra cu no por

mishi cu e punto aki sin cu revoca e acuerdo di Mesa Redonda.

Informantenan a bisa DIARIO cu e fecha di Independencia na 1996 tambe a ser yena como parti di e Acuerdo di Mesa Redonda, y cu si for di awor cuminza bisa cu e por ser revoca, no ta resta mucho mas di e acuerdo, cu tambe a ser saca for di balanza pa loke ta trata e cooperacion entre islanan.

No mester descarta e posibilidad cu proxima mente reaccionnan lo cuminza drenta ariba e declaracion di e lider di MEP, mientras cu segun informantenan na Hulanda ya preparacionnan ta ser haci pa Aruba dia 1 di Januari 1986 unicamente haya un Status Aparte juridico, esta no real.

Status Aparte di Aruba ta na peligro, y cada rato desaroyonan negativo pa su realizacion ta ser registra, mientras mester tene cuenta cu por ejemplo na e islanan chikito, ainda ta biba e pensamiento cu lo mester bay yega na un Conferencia nobo di Mesa Redonda.

PROXIMO REUNION DI COMISION
DI INDEPENDENCIA LO POR
RESULTA INTERESANTE

ORANJESTAD(AAN)— E proximo reunion di Comision di Independencia cu lo mester tuma otro siman probablemente lo por bira uno sumamente interesante, segun miembronan di e Comision a bisa DIARIO.

Aunke e miembro a muestra cu finalmente ta e Parlamento di Aruba ta bay ta den posicion di arropa e cambianan estatal pa Aruba, el a sinti cu ta den e Comision di Independencia e preparacionnan a ser haci y a menos cu e Comision no ta existi solamente pa nomber, esnan cu ta haci declaracionnan na nomber di Aruba mester tene cuenta cu e opinion di e Comision.

Lo mester bay discuti varios punto ultimamente, cu ta laga lugar pa hopi

pregunta, segun e miembro cu a muestra cu e desaroyonan di ultimo siman tabata sorprendente especialmente pa esnan cu conoce e punto di vista di e Comision.

Asina durante e proximo reunion lo mester bay mira kico ta pasando cu e Acuerdo di Mesa Redonda cu ta e base pa e cambionan estatal cu mester ser introduci na fin di aña pa Aruba habri 1986 cu su Status Aparte.

E hecho cu Aruba a secunda Hulanda den e asunto di Fondo di Solidaridad merece explicacion, segun e miembro, mescos cu e ultimo informenan encuanto e Corte di Justicia pa Aruba despues di Status Aparte.

E desaroyonan entorno di moneda tampoco tabata na agrado di e miembro cu

a bisa cu a keda palabra cu Aruba lo haya su moneda propio y punto. IMF no a aporta cu nada den e proceso di Status Aparte y awor no por bay depende di opinion di IMF pa introduci e moneda o no, e miembro a bisa.

El a muestra cu punto di vista di e Comision, cu a keda hancra den e Acuerdo di Mesa Redonda tambe tabata cu Aruba mester haya su propio moneda.

Finalmente e declaracion di e lider di MEP cu lo por introduci cambio den e fecha di Independencia, tambe lo duna base pa hopi pregunta, comoquiera cu na ningun momento e asunto aki a ser discuti den seno di e Comision.

E reunion lo bira sumamente interesante, ta e mensaje cu DIARIO a ricibi.